

07 DEC 1996

Anwar - Kerjasama

MALAYSIA-INDONESIA TINGKAT KERJASAMA DUA HALA

Oleh: Khairdzir Yunus

JAKARTA, 7 Dis (Bernama) -- Timbalan Perdana Menteri Datuk Seri Anwar Ibrahim yang tiba di sini hari ini untuk lawatan kerja dua hari berkata beberapa langkah akan diambil bagi mempertingkatkan hubungan dua hala Malaysia-Indonesia.

Anwar berkata dalam lawatannya kali ini beliau akan mengambil kesempatan untuk mengadakan pertemuan dengan beberapa menteri kabinet Indonesia, termasuk Menteri Penyelidikan dan Teknologi, B.J. Habibie.

Sejurus selepas tiba petang tadi, Anwar mengunjungi Naib Presiden, Try Sutrisno di kediamannya.

Anwar juga dijadual mengadakan pertemuan dengan Menteri Tenaga Kerja Indonesia Abdul Latief dan Menteri Perencanaan dan Pembangunan Nasional Ginandjar Kartasasmita esok, selain berjumpa beberapa pemimpin Ikatan Cendekiawan Muslim Indonesia (ICMI).

Bercakap kepada pemberita setibanya di Lapangan Terbang Halim Perdanakusumah di sini, Anwar berkata sudah ada beberapa usul daripada segi meningkatkan rangka kerjasama antara kedua-dua negara.

"Beberapa menteri lain juga akan mengadakan pertemuan dengan Mar'ie (Menteri Kewangan Mar'ie Muhammad) untuk menetapkan beberapa usaha sama antara syarikat-syarikat tempatan Malaysia dan Indonesia," katanya.

Anwar berkata rakyat kedua-dua negara yang majoritinya beragama Islam dapat mempelajari pendekatan dan pengalaman satu sama lain.

Katanya, walaupun Islam yang diamalkan di Asia Tenggara adalah sama tetapi pendekatan dan pengalaman masing-masing adalah berbeza.

Beliau berkata sikap sederhana yang diamalkan Malaysia misalnya telah memungkinkan negara berkembang maju dalam bidang ekonomi.

"Harus ada hubungan kerjasama yang lebih erat dalam bidang pendidikan, ekonomi, kewangan dan ini harus kita meterai secara yang lebih konkrit," katanya.

Anwar dijadual merasmikan penutupan Forum Antarabangsa Mengenai Sains, Teknologi dan Pembangunan Sumber Manusia di Dewan BPPT di sini petang esok.

"Perdana Menteri Datuk Seri Dr Mahathir Mohamad turut diundang (ke forum berkenaan) tetapi beliau meminta saya datang secara peribadi," katanya.

Ketika ditanya mengenai sikap yang harus diambil negara-negara Islam dalam menghadapi Barat, Anwar berkata umat Islam harus berpegang kepada sikap sederhana.

"Kerendahan hati ada tempatnya...kalau ada yang terlalu rakus dan angkuh, kita harus berbicara dengan tegas," katanya. -- BERNAMA

KHY OBA